

GÁSTA SIERRA IPMILBÁLVALUSAS

- 1 Ovdalgo ipmilbálvalus álgá, de gástajoavku bohtá girkui čohkkedit.
- 2 Oasis 1 Preludium lea vejolaš prosešuvdnan bohtit girkui.
Jos guoddá prosešuvdnaruossa, de dan guoddá ovddemusas prosešuvnnas. Dan maŋábealde guddojuvvo gástagearra ja biddjojuvvo sadjái gástajuolgái. Okta gástajoavkkus mieđušta *dan gii guoddá /daid geat guddet máná*.
- 3 Prosešuvdna ja álggahansálbma sáhttet leat oktanis.
Seammá ládje joavku sáhttá vuolgit prosešuvdnan girkus postludiuma áigge.
- 4 Gásttašeamis daddjojuvvo dušše gástakandidáhta ovdanamma (ii gaskanamma iige sohkanamma). Olles namma almmuhuvvo oasis 3 Álggahansánit.
- 5 Liturga geavaha vilges stola dahje čuovvu girkojagi ivnni.

i. Čoagganeapmi

1 |Preludium

Preludium čuojahuvvo, dábálaččat álggahansálmma ovdašuokŋan. Gástakandidáhtat, sihke mánát geat guddojuvvojit ja sii geat ieža bohtet vácci, bohtet girkui prosešuvnnas preludiuma áigge. Gástajoavku manná sadjái báikkálaš vieru mielde.

Searvegoddi čuožžila go prosešuvdna bohtá.

2 | Álggahansálbma

Searvegoddi čuožžu go álggahansálbma lávlojuvvo.

3 | Álggahansánit

└| Áhči ja Bártni ja Bassi Vuoiŋŋa nammii.

DAHJE

└| Áhči ja Bártni ja Bassi Vuoiŋŋa nammii:
Min sivdnideaddji, lonisteadji ja eallindahkki.

Searvegoddi čohkkeda.

Dás sáhtá oanehaččat mitalit ipmilbálvalusa sisdoalus.

Gástakandidáhtaid olles namma almmuhuvvo.

Dákko sáhtá leat čuovvovaš:

4 | Čoaggananrohkos

└| Rohkadallot.

JUOGO A

└/ML| Bassi Ipmil, du mii rámidit du buorrevuođa
ovddas.

Giitu go don gásttas attát nana lohpadusaid
min eallimii. Dás du muođuid ovddas mii
rohkadallat: Attášit midjiide rabas miela,
giitevaš váimmu ja veahkkás giedaid,
vai mii válldášeimmet vuostá du sáni,
máinnošeimmet du du buorrevuođastat, ja
sániiguin ja daguiguin duođastivččiimet du
stuorra daguid.

DAHJE B

L/ML | Bassi Ipmil, don leat skenken midjiide eallima.
Giitu go don válddát min
vuostá gásttas ja nanosmahtát
min eahkedismállásiin.
Láide min sániinat ja
raba min váimmuid du attáldagaide.

DAHJE C

A | Golmmaoktalaš Ipmil, don
leat gásttas addán midjiide
ruovttu du girkustat ja bidjan
min ovdii agálaš mihttomeari
iežat luhtte: Láide min iežat
geainnuide.

DAHJE D

Eará heivvolaš čoaggananrohkos.

5 | Gástta álggaheapmi

Mánáidgásta:

L | Giitosiin ja iluin mii buktit odne *dán máná/dán máná guovtto/dáid mánáid* Ipmila ovdii bassi gásttas. Gásttas Ipmil váldá min vuostá ja ovttahtá min rusiinávlejuvvon ja bajásčuožžilan Jesus Kristusiin.

Stuorit mánáid, nuoraid dahje ollesolbmuid gásta:

L | Giitosiin ja iluin mii buktit odne
NN/dán(máná/nuora)/dán guovtto/dáid (mánáid/olbmuid)/din Ipmila
ovdii bassi gásttas.
Gásttas Ipmil váldá min vuostá ja ovttahtá min rusiinávlejuvvon ja
bajásčuožžilan Jesus Kristusiin.

Sáhttá lohkat dán čálabihtá:

└ | Dasgo nu lea Ipmil ráhkistan máilmmi ahte son attii áidnorigádan Bártneis, amas oktage guhte osku sutnje mannat gáđohussii, muhto vai son oažžu agálaš eallima. [Joh 3,16](#)

└ | Gullet man ustitlaččat Jesus váldá vuostá uhca mánážiid ja rabasta sidjiide Ipmila riika:

Teavstta lohká juogo muhtin sis gii čuovvu gástakandidáhta, dahje mielliturga, dahje liturga:

ML/L | Sii gudde uhca mánážiid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja celkkii sidjiide: «Diktet uhca mánážiid boahit mu lusa, allet ge hehte sin! Dasgo Ipmila riika gullá dakkáraččaide. Duođaid, mun cealkkán didjiide: Dat guhte ii vuostáiváldde Ipmila riikka nugo uhca mánáš, ii eisege beasa dan sisa.» Ja son válddii sin sallas, bijai gieđaidis sin ala ja buressivdnidii sin. [Mark 10,13–16](#)

Stuorit mánáid, nuoraid dahje ollesolbmuid gásttas sáhttá ovddit teavstta sadjai lohkat dán:

└ | Gullet maid apostal Paulus cealká gástta birra:

ML/L | Muhto go min Ipmila ja beasti buorre vuohka ja ráhkisvuohka olbmuid almmustuvai, de son besttii min, ii min vanhurskkis daguid dihtii, muhto váibmoládisvuodas dihtii; son besttii min dainna lávgguin mas Bassi Vuoignja riegádahttá min odđasis ja odasmahttá min. Son lea valljugasat golggahan Vuoignja min badjelii Jesus Kristusa, beastámet, bokte, vai mii su árpmus dahkkojuvvošeimmet vanhurskkisin, ja doivomet mielde, árbešeimmet agálaš eallima. [Tit 3,4–7](#)

DAHJE

L | Jesus cealká ahte gásttas mii riegádit ođđasis:

ML/L | Farisealaččaid searvvis lei olmmái gean namma lei Nikodemus; son lei okta juvddálaččaid ráđdehearráin. Son bođii Jesusa lusa ihkku ja dajai: «Rabbi, mii diehtit ahte don leat oahpaheaddji gii leat boahtán Ipmila luhtte, dasgo ii oktage máhtáše dahkat daid mearkadaguid maid don dagat jos Ipmil ii livčče suinna.» Jesus vástidii sutnje: «Duođaid, duođaid, mun cealkkán dutnje: Dat guhte ii riegát ođđasis, ii beasa oaidnit Ipmila riikka.» Nikodemus jearai sus: «Mo sáhtta boares olmmoš riegádit, ii han son sáhte beassat eatni goatu sisa fas ja riegádit ođđasis?» Jesus vástidii: «Duođaid, duođaid, mun cealkkán dutnje: Dat guhte ii riegát čázis ja Vuoiŋgas, ii beasa Ipmila riikii.» **Joh 3,1–5**

DAHJE

L | Gullet maid apostal Paulus cealká gástta birra:

ML/L | Ehpet go dii dieđe ahte mii buohkat geat gásttašuvvuimet Kristus Jesusii, gásttašuvvuimet su jápmimii? Mii nappo hávdáduvvuimet suinna go gásttašuvvuimet jápmimii, vai beasašeimmet eallit ođđa eallima, nugo Áhči hearvásvuohta bajásčuoččaldahtii Kristusa jábmiid luhtte. Dasgo jos mii leat ovttahttojuvvon suinna go jápmim nugo son, de mii maddái ovttahttojuvvot suinna go bajásčuoččaldahttojuvvot nugo son. Mii diehtit ahte min boares luondu russiinávlejuvvui suinna, vai suddolaš rumaš duššaduvvo, amamet mii leat šat suttu šlávvan. Dasgo dat guhte lea jápmán, lea beassan suttu fámus. Jos mii leat jápmán Kristusiin, de oskut ahte mii maddái eallit suinna. **Rom 6,3–8**

└ | Giitot mii ja rohkadallot:

ML/L | Agálaš Ipmil, don attát eallima buot heakkalaččaide, ja leat min sivdnidan iežat gova mielde:

Mii giitit du *NN/NN (ovdanamma)* ovddas. Du čalmmiin *son lea mávssolaš /soai leaba/ sii leat mávssolaččat.* Fátmmas *su /sudno/ sin ráhkisvuodainat ja atte sutnje /sudnuide/sidjiide* ruovttu du girkustat. Amen.

ii. Sátni

6 | Čálalohkan

└ | Gullot mii Hearrá sáni.

Dákko muhtin lohká ovttá dahje guokte čuovvovaš teavsttain dahje sotnabeaivvi teavsttaid teakstagirjjiis. Teavstta lohká juogo muhtin sis gii čuovvu gástakandidáhta, dahje eará mielliturga.

└ | Jesus cealká ahte gásttas mii riegádit odđasis. Ná lea čállojuvvon Johannesá evangeliumis:

ML/L Farisealaččaaid searvvis lei olmmái gean namma lei Nikodemus; son lei okta juvddálaččaaid ráđdehearráin. Son bođii Jesusa lusa ihkku ja dajai: «Rabbi, mii diehtit ahte don leat oahpaheadji gii leat boahtán Ipmila luhtte, dasgo ii oktage máhtáše dahkat daid mearkadaguid maid don dagat jos Ipmil ii livčče suinna.» Jesus vástidii sutnje: «Duodaid, duodaid, mun cealkkán dutnje: Dat guhte ii riegát odđasis, ii beasa oaidnit Ipmila riikka.» Nikodemus jearai sus: «Mo sáhtá boares olmmoš riegádit, ii han son sáhte beassat eatni goatu sisa fas ja riegádit odđasis?» Jesus vástidii: «Duodaid, duodaid, mun cealkkán dutnje: Dat guhte ii riegát čázis ja Vuoiŋgas, ii beasa Ipmila riikii.» **Joh 3,1–5**

3.20 gástaortnet 2017 **Gástaortnet – gásta sierra ipmilbálvalusas**

DAHJE

┌| Apostal Paulus cealká gástta birra Titusa girjjis:

ML/L | Muhto go min Ipmila ja beasti buorre vuotta ja ráhkisvuotta olbmuid almmustuvai, de son bestii min, ii min vanhurskkis daguid dihtii, muhto váibmoládisvuodas dihtii; son bestii min dainna lágguin mas Bassi Vuoigŋa riegádahtta min ođđasis ja ođasmahtta min. Son lea valljugasat golggahan Vuoigŋa min badjelii Jesus Kristus, beašamet, bokte, vai mii su árpmus dahkkojuvvošeimmet vanhurskkisin, ja doivomet mielde, árbešeimmet agálaš eallima. **Tit 3,4–7**

DAHJE

┌| Apostal Paulus cealká gástta birra

Rom searvegoddái:

ML/L | Ehpet go dii dieđe ahte mii buohkat geat gásttašuvvuimet Kristus Jesusii, gásttašuvvuimet su jápmimii? Mii nappo hávdáduvvuimet suinna go gásttašuvvuimet jápmimii, vai beasašeimmet eallit ođđa eallima, nugo Áhči hearvásvuotta bajásčuoččaldahtii Kristus ja jábmiid luhtte. Dasgo jos mii leat ovttahttojuvvon suinna go jápmat nugo son, de mii maiddái ovttahttojuvvot suinna go bajásčuoččaldahttojuvvot nugo son. **Rom 6,3–5**

DAHJE

┌| Apostal Paulus cealká gástta birra

Galatia searvegoddái:

ML/L | Dasgo dii lehpet buohkat Ipmila mánát go oskubehitet Kristus Jesusii. Buohkat dii geat lehpet gásttašuvvon Kristusii, lehpet gárvodan Kristusiin. Dás ii leat juvddalaš dahje greikalaš, šlávva dahje isit, olmmái ii ge nisu, dasgo dii lehpet buohkat okta Kristus Jesusis. **Gal 3,26–28**



DAHJE

└| Apostol Paulus duodašta mii lea min oskkudávvir geat leat gásttašuvvon. Ná lea čállojuvvon Rom searvegoddái:

ML/L| Gii dalle sáhtá earuhit min Kristusa ráhkisvuodas? Sáhtá go átestus, ballu, doarrádallojupmi, nealgi, álásvuohka, heahti dahje miehkki? Dasgo mun lean vissis das ahte ii jápmin ii ge eallin, eai eŋgelat eai ge eará oaivámuččat, eai dat mat leat dál eaige dat mat bohtet, dahje miige fámuidd, eai dat mat leat badjin eai ge dat mat leat čiekŋalassas, sáhte earuhit min Ipmila ráhkisvuodas Kristus Jesusis, min Hearrásteamet.
Rom 8,35.38–39

Eará heivvolaš teavsttat:

Sál 8,4–6.10; Sál 139,13–16; Matt 3,13–17; Mark 9,33–37; Joh 3,5–8; Apd 2,37–41, Apd 8,36–38; Ef 3,14–21; 1 Joh 3,1–2

Teakstalohkama sáhtá loahpahit ná:

Nu lea Hearrá sártni.

7 | Gástasálbma

Gástasálbma sáhtá boatkut vearssaid mielde, muhtin vearssaid lávlu ovdal ja muhtin vearssaid maŋŋil sártni.

8 | Sárdni

Liturga doallá oanehis sártni mii gullá ovttá tekstii dahje eanet teavsttaide mat leat juo lohkkjuvvon.

Sártni sáhtá loahpahit čuovvovaš máidnumiin:

└| Gudni lehkos Áhččái ja Bárdnái ja Bassi Vuignii, gii lei ja lea ja bissu oktan duohta Ipmiliin agálašvuodas agálašvuhtii.



iii. Ovddasrohkos

Dán liturgiijas sáhtta guođit ovddasrohkosa.

9 | Searvegotti ovddasrohkos

Rohkososiid manjil vástida searvegoddi oanehaččat.

┌ | Giitot mii ja rohkadallot:

JUOGO

ML/L | Almmálaš Áhčči:

Giitu go don leat sivdnidan min.

Giitu go don leat sivdnidan eatnama gos mii orrut.

Giitu go don dovddat min ja ráhkistat min.

Veahkehivččet min atnit fuola guhtet guimmiineamet
ja buot das maid don leat sivdnidan.

M | Hearrá, gula min rohkosa.

ML/L | Ráhkis Jesus:

Don leat vuoitán jápmima ja buot bahá badjel.

Don leat min ustit. Don leat min mielde buot beivviid.

Giitu go mii beassat leat oadjebasat du luhtte.

Doarjal ovttaskasaid ja sin geat leat balus.

Oahpat min leat doarjjan guhtet guimmiidasamet.

Veahket min vuostálastit vealaheami ja vuoigatmeahttunvuoda.

M | Hearrá, gula min rohkosa.

ML/L | Buorre Bassi Vuoign̄a:

Don čájehat midjiide iežat geainnu.

Attášit midjiide dáhtu ja fámu vádjolit dan mielde.

Attášit midjiide viisodaga ja nanusvuoda bisuhit searvevuoda.

Don leat bidjan min du girkot lahttun.

Boaðášit min lusa du attáldagaiguin

ja divttášit min eallit čuovgan ja sáltin máilmmis.

M | Hearrá, gula min rohkosa.



iv. Gásta

10 | Gástagohččun

┌ | Gullot mii Jesusa sáni ja gohččuma bassi gástta birra:

Teavstta lohká juogo muhtin sis gii čuovvu gástakandidáhta, mielliturga dahje liturga:

ML/L | ««Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin, gásttašettiin sin Áhči ja Bártni ja Bassi Vuoiŋŋa nammii, ja oahpahettiin sin doallat buot dan maid mun lean gohččon din doallat. Ja mun lean dinguin buot beivviid gitta dálá máilmmi loahpa rádjái. **Matt 28, 18–20**

11 | Risvánhemiid geatnegasvuohta

Mánáidgásta:

┌ | Vánhemat ja risvánhemat sáhttet dál čuožžilit. Dii lehpet duodašteaddjin dasa ahte *dát máná lea /dát mánát leaba/dát mánát leat* gásttašuvvon kristtalaš gásttain. Dis lea, ovttas min searvegottiin ja oppa min girkuin, bassi geatnegasvuohta atnit fuola *mánás (sus) / máná guovttos (sudnos) / mánáin (sis)*, rohkadallat *máná (su)/máná guovtto (sudno) / mánáid (sin)* ovddas, oahpahit *su /sudno/ sin* rohkadallat ja geavahit Ipmila sáni ja bassi eahkedismállásiid, vai *son eallá /soai ealliba/ sii ellet* oskkus ja *nanosmuvvá/nanosmuvvaba/nanosmuvvet* kristtalaš oskkus.

Stuorit mánáid, nuoraid ja ollesolbmuid gásta:

└| Vánhemat ja risvánhemat sáhttet dál čuožžilit.

Dii lehpēt duođašteaddjin dasa ahte *NNlea /dát (mánát/nuorat) leaba/dát (mánát/nuorat/olbmot) leat* gásttašuvvon kristtalaš gásttain. Dis lea, ovttas min searvegottiin ja oppa min girkuin, bassi geatnegasvuohta atnit fuola *sus/sudnos/sis*, rohkadallat *su/sudno/sin* ovddas, oahpahit *su/sudno/sin* rohkadallat ja geavahit Ipmila sáni ja bassi eahkedismállásiid, vai *son eallá/soai ealliba/sii ellet* oskkus ja *nanosmuvvá/nanosmuvvaba/nanosmuvvet* kristtalaš oskkus.

12 | Biehttaleapmi ja osku

Mánáidgásta:

└| Dovddastehkot mii biehttaleami ja oskku masa mii gásttašuvvot.

Buohkat čuožžilit.

Stuorit mánáid, nuoraid ja ollesolbmuid gásta:

└| Dáhtut go don ovttas searvegottiin dovddastit biehttaleami ja oskku masa mii gásttašuvvot?

Gástaolmmoš | Dáhtun

Gástaolmmoš sáhtá vástidit dáhtun, juogo dákko dahje gásttašeami oktavuodas, dahje duođaštit dan eará ládje go sániiguin.

Álggos jerrojuvvo sis geat ieža vástidit. Go buohkat leat vástidan, de liturga dadjá:

└| Dovddastehkot mii biehttaleami ja oskku.

Buohkat čuožžilit.

**Buo | Mun biehttalan beargalagas
ja buot su daguin ja buot su meanuin.**

**Mun oskkun Ipmil Áhččái,
buotveagalažžii, almmi ja
eatnama sivdnideaddjái.**

**Mun oskkun Jesus Kristusii,
Ipmila áidnoriegádan Bárdnái, min Hearrái,
gean Bassi Vuoigŋa sahkanahhtii,
gean nieida Maria riegádahtii,
ja guhte givssiduvvui Pontius Pilatusa áiggi,
russiinávlejuvvui, jámii ja hávdáduvvui,
njejjai jábmiid riikii,
bajásčuožžilii jábmiid luhtte goalmmát beaivvi,
manai bajás albmái, čohkká Ipmila,
buotveagalaš Áhči, olgeš gieda bealde,
boahotá fas doppe dubmet elliid ja jábmiid.**

**Mun oskkun Bassi Vuigŋii,
bassi oktasaš girku,
bassi olbmuid searvevuoda,
suttuid ándagassii addojumi,
oačči bajásčuožžileami ja agálaš eallima.**

Amen. [Apostallaš oskkudovddastus](#)

13| Gásttašeapmi

Čáhci leikejuvvo gástalihtái.

┌| Váibmoládis Ipmil, giitu go gástačáhci oktan sániinat lea árpmu ája, mas don attát midjiide min suddiid ándagassii, beasttát min jápmima fámus ja attát midjiide agálaš eallima lohpadusa. Vuolggahivččet du Vuoiŋŋat čuoččáldahttit *su gii gásttašuvvo/sudno geat gásttašuvvoba/sin geat gásttašuvvojit* ođđa eallimii Jesus Kristusiin, min Hearráin.

Gásttašemiid gaskkas lávlojuvvo okta sálbmavearsa dan sálmmas mii lea välljejuvvon.

Sii geat čuvvot dan gii gásttašuvvo, bohtet gástalihti lusa.

Mánáidgásta:

┌| Mii lea máná namma?

Dat gii doallá máná, dadjá máná nama.

┌| Dáhttubehtet go ahte NN gásttašuvvo Áhči ja Bártni ja Bassi Vuoiŋŋa nammii ja bajásgessojuvvo kristtalaš biehttaleamis ja oskkus?

Dat gii doallá máná, vánhemat/ ovddasteaddjit ja risvánhemat, vástidit:

Dáhttut.

Stuorit mánáid, nuoraid ja ollesolbmuid gásta:

┌| Mii du namma lea?

Dat gii gásttašuvvo, vástida ieš ja dadjá iežas nama.
Jos lea dárbbalaš, de eará olmmoš sáhtá dadjat dan nama.

┌| NN, dáhtut go don gásttašuvvot Áhči ja Bártni ja Bassi Vuoiŋŋa nammii ja eallit kristtalaš biehttaleamis ja oskkus?



Dat gii gásttašuvvo, vástida:
Dáhtun.

Liturga jorgala mánnái/gástakandidáhttii čalmmiid ja rohkadallá gávugieđaid.

┌| Ipmil várjalivččii du vuolgima ja du boahtima dálážiis ja agálaš áigái. Mun merken du bassi ruossa mearkkain ✠ duodaštussan ahte don gulat russiinávlejuvvon ja bajásčuožžilan Jesus Kristusii ja oskkut sutnje.

┌| *NN*, min Hearrá Jesus Kristusa sáni ja gohččuma mielde mun gásttašan du Áhči ja Bártni ja Bassi Vuoiŋŋa nammii.

Dajadettiin dáid sániid liturga goive goapmiriin čázi golmma geardde su oaivvi ala gii gásttašuvvo.

Liturga bidjá gieđa su oaivvi ala gii gásttašuvvui ja sáhttá bivdit risvánhemiid dahkat seammá ládje, ja dadjá:

┌| Buotveagalaš Ipmil lea gásttas addán dutnje Bassi Vuoiŋŋa, riegeadahttan du odđasis ja váldán du oskkolaš searvegoddásis. Ipmil nannešii du árpmuinis agálaš eallimii. Ráfi lehkos duinna.

De čájehit máná searvegoddái dahje loktejit oidnosii. Go stuorit mánát, nuorat dahje ollesolbmot leat gásttašuvvon, de sii ieža sáhttet jorgalit searvegoddái čalmmiid.

Čuovvovaš sánit daddjojit:

┌| Dá lea *NN*, Ipmila mánná, gásttašuvvon min searvegoddái lahttun ja Kristusa máilmmiviidosáš girkui.

3.28 gástaortnet 2017 Gástaortnet – gásta sierra ipmilbálvalusas



Juohke gásttašeami ja gásttašuvvon olbmo čájeheami manjil sáhhtá cahkkehit gintala.

Liturga sáhhtá dadjat:

┌ | Mii cahkkehit gintala *NN várás*.

Gástagintala bidjá ginttaljuolgái.

Go visot gástagintalat leat cahkkehuvvon, liturga dadjá:

┌ | Jesus cealká: «Mun lean máilmmi čuovggas. Dat guhte mu čuovvu, ii goassege vádjol seavdnjadasas, muhto sus lea eallima čuovggas.» *Joh 8,12*

14 | Rohkos ja máidnun

┌ | Giitot mii ja rohkadallot.

JUOGO A

ML/L | Oskkáldas Ipmil, mii giitit du gástta ovddas, mas don válddát min vuostá ja gohčut min namain.

Mii rohkadallat *NN/máná guovtto (sudno)/mánáid (sin)* ovddas *gii/geat* odne *lea/leaba/leat* gásttašuvvon. Leage *su/sudno/sin* mielde eallimis ja várjal *su/sudno/sin* gástta árpmus. Nannešit vánhemiid ja risvánhemiid gástta geatnegasvuodas.

Ipmil, gula min rohkosa.

DAHJE B

ML/L | Oskkáldas Ipmil, mii giitit du gástta ovddas, mas don válddát min du girkosat.

Mii rohkadallat *NN/máná guovtto (sudno)/mánáid (sin)* ovddas *gii/geat* odne *lea/leaba/leat* gásttašuvvon. Gáhtte *su/ sudno/sin* du suodjaleaddji gieđain. Atte ráhkisvuoda ja viissisvuoda sidjiide geat galget atnit fuola *sus/sudnos/sis*.

Ipmil, gula min rohkosa.



DAHJE C

ML/L | Oskkáldas Ipmil,

mii giitit go don leat ásahan gástta

ja lohpidan ahte Jesus lea min mielde buot beivviid.

Mii rohkadallat *NN/sudno/sin* ovddas *gii/geat* odne *lea/leaba/leat*

gásttašuvvon. Várjal *su/sudno/sin* vai *son bisošii/soai bisošigga/sii*

bisošedje oskkus, ja *vádjolivččii/soai vádjolivččiiga/sii vádjolivčče*

čuovgasis ja *olahivččii/olahivččiiga/olahivčče* agálaš mihttomearri

du riikkas.

Ipmil, gula min rohkosa.

Áhččeminrohkosa lohká dáikko. Jos leat eahkedismállásat

ipmilbálvalusas, de ii lohkkjuvvo Áhččeminrohkos dáikko.

L | Rohkadallot dan rohkosa maid Jesus ieš lea oahpahan:

Buo | **Áhččámet, don guhte leat almmis!**

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min sudduid ándagassii,

nugo mii ge ándagassii addit velggolaččaidasamet.

Ale doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

Lea vejolaš lohkat Áhččeminrohkosa 1977-liturgiija dahje
1920-liturgiija mielde.

L | Máidnojuvvon lehkos Ipmil, Hearrámet Jesus Kristusa
Áhčči. Stuorra váibmoláđisvuodastis son lea riegádahtán
min ođđasis ja addán midjiide ealli doaivvu go
bajásčuoččáldahtii Jesus Kristusa jábmiid luhtte. **1Pet 1,3**

Jos gástaimilbálvalusas leat eahkedismállásat, de dat leat dátko.

15 | Musihkka

Dátko sáhttet sii geat čuvvot gástakandidáhta dahje earát,
lávlu heivvolaš sálmma dahje sáhtá čuojahuvvot musihkka.

v. Vuolggahus

16 | Loahpahansálbma

Searvegoddi čuožžu sálmma lávlludettiin ja buressivdnádusa guladettiin.

17 | Buressivdnádus

Buressivdnádusa sáhtá messet dahje lohkat.

Buressivdnádusa guladettiin sáhttet olbmot russestit.

Buressivdnádusa álggahettiin lávlojuvvo:

ML/L lávlu | Máidnot Hearrámet.

Searvegoddi čuožžila

s | Máidnojuvvon lehkos Ipmil. Halleluja. Halleluja. Halleluja.

DAHJE

L **dadjá** | Váldet vuostá buressivdnádusa.

Searvegoddi čuožžila.

L | Hearrá buressivdnidivččii du ja várjalivččii du. Hearrá divttášii muođuidis čuovgat du badjelii ja livččii dutnje árbmugas. Hearrá bajidivččii čalmmiidis du ala ja attášii dutnje ráfi.. ✠

Jos buressivdnádus messejuvvo, de lávlu searvegoddi:

s | **Amen. Amen. Amen.**

Golmma geardde golbmii čuodjalahttit girkobielluin.

18 | Loahpaheapmi

Jos searvegoddi báhcá čohkkát postludiuma áigge, de loahpahansánit sáhttet daddjot postludiuma manjil.

JUOGO

L | Mannet ráfis.

DAHJE

L | Mannet ráfis. Bálvalehket Hearrá iluin.

Lea vejolaš eará loahpahansániid dadjat mat heivejit beaivvi erenoamášvuhtii.



19 | Postludium

Jos lea prosešuvdna mii álggos vuolgá, de searvegoddi čuovvula dan.
Ipmilbálvalusa manjil oažžu girku doallat rabasin ovtta áiggi, vai
olbmot besset govvet, cahkkehit gintaliid dahje jaskadit rohkadallat.

